

PAKET HRANE, 20 KM I OBEĆANJE ZA VEĆU PENZIJU U ZAMJENU ZA GLAS NA IZBORIMA

U manjim mjestima politički manevri su učestala pojava. Ženska osoba (70 godina) je iznenada postala dio priče u kojoj su se prikupljali glasovi za jednog kandidata za nadolazeće Opće izbore 2022. godine koju je u njenom mjestu sprovodila jedna od većih stranaka i njen predstavnik i predvodilac lokalne vjerske zajednice.

Prvi krug nagovaranja: Paketi hrane i izborne preporuke

Jednog dana, ženska osoba je otvorila vrata neočekivanoj posjeti stranke u pratnji lokalnog vjerskog poglavara. Donijeli su joj pakete sa hranom i suptilno joj preporučili da glasa za određenog kandidata na predstojećim izborima 2022. godine. Dvojac je naglasio da su stranka kao i kandidat za kojeg bi trebala glasati oličenje vodstva za njeno mjesto.

Drugi krug nagovaranja: Potpis u rokovnik stranke za 20 KM

Kako su se bližili izbori, ženska osoba je ponovno dočekala posjetu. Ovog puta su joj se obratili sa neobičnim zahtjevom, rekli su joj dati 20 KM ako se upiše u neki rokovnik, na šta je i pristala.

Obećanja za veću penziju

U nastojanju da osiguraju njenu odanost, data su joj obećanja. Stranka ju je uvjerala da će joj povećati penziju, što je i uticalo na njenu odluku da glasa za kandidata kojeg su joj naveli. Na dan

izbora, ona je dala svoj glas navedenom kandidatu.

Samo je fotografija glasačkog listića dokaz odanosti stranci

Kako bi stranka bila sigurna da je njen kandidat dobio glas, rekla je da je njen sin morao da fotografiše njen glasački listić i da pošalje sliku jednom od mladića koji je bio član te stranke u njenom mjestu. Navodi kako je taj mladić na taj način vršio kontrolu svih stanovnika njenog mjesta da bi se provjerilo ko je kako glasao.